



Prof Yaacob Tokoh Maulidur Rasul Kebangsaan



Prof. Dr. Yaacob Che Man menerima Anugerah Tokoh Maulidur Rasul Kebangsaan 2010 daripada Seri Paduka Baginda Timbalan Yang di-Pertuan Agong, Tuanku Abdul Halim Mu'adzam Shah.

PUTRAJAYA, 26 Feb – Pengarah Institut Penyelidikan Produk Halal (IPPH) Universiti Putra Malaysia (UPM), Prof. Dr. Yaacob Che Man mengharumkan nama UPM apabila terpilih sebagai penerima Anugerah Tokoh Maulidur Rasul sempena Sambutan Maulidur Rasul Peringkat Kebangsaan 1431 Hijrah.

Beliau yang merupakan saintis pertama menerima Anugerah Saintis Halal di Sidang Kemuncak Penyelidikan Halal Dunia 2009 berkata usahanya memperjuangkan pembangunan industri halal negara adalah untuk mempertingkatkan kepentingan logo halal Malaysia.

“Anugerah ini merupakan satu penghormatan besar kepada saya dalam usaha membangunkan industri halal terutamanya untuk memastikan logo halal Malaysia berwibawa tinggi dan dihormati dunia,” katanya yang menerima hadiah wang tunai RM22,000, plak, sijil dan hadiah iringan.



Turut hadir adalah Perdana Menteri, Datuk Seri Najib Tun Razak (berbaju oren) dan Timbalan Perdana Menteri, Tan Sri Muhyiddin Yassin (kiri sekali) .

Tambahnya, pengiktirafan itu selari dengan usaha kerajaan untuk membangunkan Malaysia sebagai pusat rujukan halal dunia dan seiring dengan kempen halal 1 Malaysia yang sedang dijalankan di Masjid Negara.

Prof. Yaacob yang aktif menjalankan penyelidikan penggunaan sumber haram dalam makanan dan kosmetik turut berkata negara perlu bijak apabila berdepan masalah kebanjiran logo halal yang tidak sah sejak akhir-akhir ini.

“Oleh sebab status halal Malaysia sangat berwibawa dan dipandang tinggi termasuk oleh Pertubuhan Negara Islam Sedunia (OIC), penguatkuasaan undang-undang perlu lebih tegas agar penggunaan logo halal dapat dikawal pengesahannya,” katanya.



Prof. Yaacob bersama hadiah iringan dan sijil yang diterimanya di Masjid Putra, Putrajaya.

Berita ini disediakan oleh Seksyen Media, Bahagian Komunikasi Korporat UPM. (Ili Syazwani Zahimi 03-89466013).